



Nga Ibnu Abbasi (Allahu qoftë i kënaqur me të) përcillet se i Dërguari i Allahut (paqja dhe bekimi i Allahut qofshin mbi të) ka thënë:

“Natën kur u ngrita në qiell, ndjeva një aromë të këndshme! Thashë: “Ç’është kjo aromë e këndshme, o Xhibril?!”

“Është aroma e floktarës së bijës së Faraonit dhe bijve të saj.” – ma ktheu ai.

Thashë: “Ç’është puna e saj?!”

Tha: “Përderisa po krihte flokët e bijës së Faraonit, i ra krehri nga dora dhe tha: “Bismillah (Me emrin e Allahut).”

E bija e Faraonit e pyeti atë: “Të babait tim?!”

Ajo iu përgjigj: “Jo, por të Zotit tim, Zotit tënd dhe Zotit të babait tënd, Allahut.”

Tha: “A ke Zot tjetër përveç babait tim?!”

Ajo ia ktheu: “Po!”

Tha: “T’i tregoj atij për këtë?”

Tha: “Tregoji!”

Kur ajo e lajmëroi Faraonin, ai e thirri menjëherë atë dhe i tha: “Oj filane, mos vallë ke ndonjë Zot tjetër veç meje?”

Ajo iu përgjigj, duke i thënë: “Po! Zoti im dhe Zoti yt është Allahu.”

Atëherë, ai urdhëroi që të sillej një enë e gjerë bakri dhe të vlohej. Pastaj u morën bijtë e saj dhe u hodhën në të, një nga një.

“Kam një kërkesë nga ti!” – tha ajo.

“Ç’kërkesë?” – ia ktheu Faraoni.

“Dëshiroj të mi bashkoni eshtrat e mia me eshtrat e birit tim në një rrobë të vetme dhe të na varrosni së bashku.” – iu përgjigj ajo.

“Do ta bëjmë atë.” – i tha Faraoni.

Bijtë e saj vazhduan të hidheshin në enën e gjerë, derisa në fund i erdhi radha fëmijës së saj, i cili ende ishte foshnjë gjiri. Ajo, sikur filloi të lëkundej për shkak të tij. Por, fëmija i tha: “Oj nëna ime! Hidhu, se dënimi i dunjasë është më i lehtë sesa dënimi i ahiretit.”[\[1\]](#)

Dobitë e Hadithit

1. Durimi dhe qëndrueshmëria gjatë kohëve të sprovave.
2. Shpërblimi është sipas llojit të veprave.
3. Shpërblimi i madh i takon atij që është i qëndrueshëm në fenë e tij dhe nuk i trembet qortimit të asnjë qortuesi. **?Vërtet, ata që janë të durueshëm, do të shpërblehen pa masë.?**
4. Lejohet që muslimani të kërkojë ndonjë çështje në të cilën ka dobi edhe nga tagutët, siç ka

kërkuar kjo grua që ta varrosë hirin e saj me hirin e bijve të saj.

5. Allahu iu gjen rrugëdalje miqve të tij gjatë vuajtjeve dhe vështirësive.

6. Vërtetimi i kerameteve të miqve të devotshëm të Allahut.

7. Disa nga kerametet janë të jashtëzakonshme.

Përktheu: **Jusuf Kastrati**

Marrë nga libri: "60 kissah rauaha En-Nebijju s.a.v.s. ue as'habuhu" - Muhammed ibn Hamid

[1] Hadithin e transmetojnë Ahmedi (3/309), Taberaniu në El-kebir (12279), (12280), dhe Ibnu Hibbani (2892), (2893).